

嘉慶松江府志

松江府志卷七十五

名蹟志

寺觀

華亭縣

普照講寺 雲閒志在縣西二百八十步唐乾元中建覺  
岸稽古略云初名大明寺大中祚符三年有旨以華亭  
陸機舊宅大明寺改爲普照講寺至元嘉禾志載寺有  
陸將軍祠地本陸氏園亭因以祠焉又有北方天王祠  
吳越王加封護國沈存中筆談載雷震天王寺屋柱倒  
書曰高洞揚雅一十六人大令章凡十一字內令章兩

字特奇勁似唐人書體今石刻尙存元季燬於兵僧道敏重建明代住僧名偶大城居敬等相繼興復有海月堂秀朶軒涵暉室香水海靜觀堂詳載普照續古錄

國朝雍正三年上海節婦某氏捐貲重建乾隆十二年僧佛定募資重建景蘇閣四十八年里人沈虞揚等捐修

### 殿閣

宋釋北磧重建西方殿記略 華亭具體蘭若莫如普照其間莊嚴壯麗莫如無量壽殿殿之殊特浙江以西邈焉真儔孟春之月會千萬人前榮軒豁八窗玲瓏佛與四衆咸得相見如明月鏡中見其面像又若帝網交光相羅如擊其蒙如發其薊費倍萬計談笑而集真懿大師忠信崇教大師祖祥善倡徒屬各致其力作於嘉定九年正月落成於十二年四月鄉也室隘而不見佛不見之見初不加損今無室隘而

得見佛所見之見初不加益見見之時雖佛亦物見  
不能及非物非佛或曰佛固自若也吾見固自若也  
有見不見也何故則曰罔克在念狂聖由是即見離  
見書以授真懿使喻入社之淨信者俾知室隘宏敞  
未始二焉

北彌干僧堂記略 堂容萬指盡於某年之寇亦既  
久矣遠人偉其名務先觀為快今也漠然人以爲名  
在實亡乃與柳柳州鐵驢步志同崇敎大師祖祥聚  
族而謀曰有志者勇有爲樂施者不吝嗇吾僧於此  
逾四紀凡所興建根核片瓦罔不與舍我事罔集且  
吾生平不妄受受則辨禮義而不及利檀信稍孚將  
有以相吾志誓鼎新以終老市材僦工權輿於嘉定  
庚寅春仲輪奐於辛卯季秋越明年而崇敎寂又明  
年嗣孫智淵能繼其志而復其舊成不愆期美不踰  
制惟壯壯惟固勿事侈靡窗牖洞啓牀榻衡直匪離匪  
琢隨宜加飾華鯨吸月巨鏞橫撞鯨背在前犀顙茁  
霜旃檀無雜蘼藿有序本無位次如法而住十利五  
觀敢忘講明以福君親以保兆民謂吾  
素餐吾餐用素於昌明時密贊潛輔

元年蘇重建千僧堂記略 松江普照寺有千僧堂  
自唐乾元宋淳祐兩度申回祿之厄無復舊觀崇教  
大師祖祥之所建潼川北碕居簡之所記者悉爲瓦  
礫之場歲在丙子萬戶沙侯來鎮是邑與慧悟興教  
大師雲秀相與倡率首創鐘樓庫堂西廡而千僧堂  
未遑暇也又四年乙卯里人趙架閣施所居堂爲之  
因陋就簡意未稱臨化之際專以是事付之後人於  
是其徒智受銖積寸累且承檀施癸卯於舊址重建  
是堂寬明周密風日不到設坐備物使僧衆得以如  
法而住繕誦經帙出則聽說法申祝讚功德無量因  
來求文以記重說偈言曰盛哉海會千僧之堂是爲  
普照選佛之場萬中選千千中選百於百之中又選  
其一愈選愈少其義伊何人以爲少我猶日多有如  
此堂願力所造窗几觀課牀座完好夏有疏簾冬有  
重席攝衣而起振履而出于僧齊唱一口百聲千口  
萬聲清徹朗明有大導師默然晏坐忽獅子吼喚醒  
惛墮闢者震起得大警悟須臾之頃萬化咸具凡諸  
佛子皆得度已稽首普照朝夕彈指至大元年十二  
月十六日

牟獻澤迦毘記略 松江普照寺晉陸士衡別業也  
北坐九峯攢青擁翠相爲蔽虧陰陽者流謂風氣藏  
聚可容千衆蓋於佛僧爲宜也唐乾元時本號大明  
寺僧良慧嘗創釋迦如來殿逮宋祥符間改賜今額  
凡三度重建淳祐戊申厄於祝融里人錢武翼首議  
興造其事未竟子大信竭力繼之咸淳甲戌僧慧思  
與武翼念不可廢前人功請行超典殿畢塗堅營像  
設於是慧辨賢慧悟秀以白鎮守沙侯欣然厚施久  
之而就萬瓦鴛浮重檐翬跂加以藻繪金碧交輝中  
設釋迦像若左若右分列八位備極莊嚴而三世如  
來圓通大士應真羅漢諸天人之相亦次第而成至  
於琉璃無盡燈瓜華諸供具莫不完好每歲州侯率  
其僚屬於此建道場申祝讚而禱水旱饘風災者亦  
皆至焉夫成之難則其傳之也必久是役也再見丁  
未甲子復周葺非一手足之力而超成其終超旣寂  
其孫子聞重修來要求文以記乃爲之贊曰維昔普  
照王本自法身出光明攝方寸虛空常獨耀盡三十  
大千無量河沙界皆佛慧照中夫是之謂普衆生宿  
業重展轉墮迷誤願佛垂慈憫與除諸障礙譬如摩  
尼珠炯炯照濁水一作是念已業去障自空而我初

不覺心目劃開朗稽首釋迦尊爲我證

明之至大戊申三月既望趙孟頫書

牟巖千佛水陸院記略 普照寺自唐乾元元年

於宋數百年矣屢興屢廢淳祐戊申迄今又六十年

寺之山門兩廡佛殿次第興建千佛水陸院地廣

鉅衆請屬之惠慈大師志新既領主席慨然捐衣

營檀施寺僧元德爲之分幹徒淨恩淨心爲之協贊

大作新之至於戊戌繼奉護持之旨具事尤嚴越丁

未乃求記于復之日善必由積累而後成佛經云不

於一佛二佛三四五佛而種善根已於百千萬佛而

種善根昔梁武帝嘗製水陸儀文三年而成幾三千

卷其後差設者以十六位各分八位而爲上下召請

卽通三時法雖簡施則博其上八位慈容端相爲人

敬慕下八位殊形詭狀爲人恐怖有善有惡有勸有

戒今惠慈於此二役位置曲當山門兩廊壁涌天台

聖域五百仙流閣上設西方三聖銅鑄千佛閣下設

千尊盧舍那佛普賢文殊二大士左右壁涌水陸冥

陽三界像飾以金采眩耀衆目輝映方池而其池面

水菡萏敷披飛檻相屬生香不斷疑從淨土移來此

地諸佛子於焉修行莫不起然得大自在皆惠慈十

年之間苦心勞形所成就亦其胸中自來積善如木有根故一念所發有此殊勝非徒極莊嚴事觀美也銘曰我觀人心內有善原無惡顛迷彼弗知往往路頭錯爾時諸天人一切諸菩薩忽現慈善相與衆共說法法皆由心造罪亦由心起心空罪亦空各已得度已衆生地獄衆六道阿修羅隨佛登天堂只在一刹耶至大二年十月既望

牟獻撰趙孟頫書并篆

張之翰普照寺藏殿記略 松江普照寺據通閩俯

連騎爲羣刹冠淳祐間燬於火若廚若廊若大殿由

宋及國朝皆次第崇修稍還舊觀惟藏殿一瓦礫場

耳梵修主僧希白居刹之四年會郡富室王國英及

諸大檀那來助始至元十九年三月迄三十一年十

一月越十有三載而藏殿成共費錢一十五萬殿二

十楹藏崇五丈廣半之金碧照耀髹漆光明上有飛

仙橋中有棲經函旁有鐵圍山下有香水海每巨植

砮轟人運機而神通力如車之旋如風之行如雷霆

之驚壯麗傑特雖百歲老人以爲希有明年白藏始

末求子文子曰初經之未廣也或以金或以銀或以

血寫者常多及經之既廣也印於福印於杭印於蘇



讀者益少今五千四十八卷貯以五百四十八函而總爲一藏以一藏而藏之一輪豈徒張皇詭異以誇一方耶抑將見學者朝講夕誦內有所自得耶昔溫州安禪師精究律藏嘗讚金剛般若時謂之安楞嚴二師纔了一經已足超詣況博三藏者乎如白之哀集經律論諸書包涵萬有覺悟羣迷使人隨取隨足其用心固勤矣雖然凡開是藏問是經曾知經自佛口中來藏從人心上轉天宮有此法輪人心亦作此法輪龍宮有此海藏人心亦有此海藏白合掌作禮曰聞公之說是人心藏心同一悟轉乃藏之無盡者也願勒石垂不朽故書以授明張鑒重修普照寺記略普照寺內列釋迦觀音彌陀藥師四殿普賢看經千佛三閣井亭寶塔分列東西鐘樓寶藏析居左右而又翼以廊廡周以院舍爲諸刹之冠逮元季入國朝漸次興舉正統年間眞定趙侯豫來守是邦親正殿傾頽而鼎建之天順閒東廣李侯惠崇建三大士殿規度殊特成化閒櫻山王侯衡建西方佛殿未成適年刊南劉侯璟捐俸聚資分委僧綱都綱淨心守璽暨僧能像協力贊襄穹

樟廣雷架棟修案髹彤金碧絢耀華美興工辛亥畢  
工癸丑都綱惇心輩咸謂郡侯興廢之功不可以無  
述乃伐石徵言為記  
宏治六年癸丑三月

國朝王項齡重修普照寺記略郡城谷陽門內有古刹

曰普照寺其遺址乃二陸故宅唐時已為浮屠宮賜  
額曰大明宋祥符間又敕賜為普照自元明至

國朝規模宏敞歷年滋久殿宇傾圯而丈六金身亦幾踣

寒煙衰草中余官京師數載其圯毀傾頽大約更甚  
適聞上海蔭婦口氏獨倡善緣呈請捐橐鼎新誓復

舊制郡人悉嘉其願力之宏又竊慮其工之鉅費之  
繁事之不易成也乃氏則志堅行苦百折不回囊金

既盡繼之以典簪珥鬻田莊運甓擔輶身親傭作曾  
不數月而樓栢翼如金碧煥如壯麗輝煌巍然名刹

氏焚焚一簣婦年六十且無子非求後福者而倒篋  
傾囊弗底於成勿已非其夙具善根焉能成是舉也

管子云匹夫有善可得而旌況起久廢之大  
功而出自一匹婦哉雍正三年四月立石

海月堂宋慧辯大師說法處慧辯字訥翁祥符間真宗  
賜號海月遂以名堂時東坡為杭通守與結方

寺觀上  
名蹟志

外緣堂舊五楹當正殿後歲月既深風雨垂剝萬歷辛亥錢道者募改爲閣又十餘載蜀僧禪寂太虛成之名景蘇閣因坡公也

柏子庵

卽靜觀堂中奉白衣大士寺僧貧不能守前後

僧性敏修誦庭有古柏董文敏題曰柏子庵縣志云卽貽遠山房在普照西北隅

善住教院

在普照寺內東北隅宋皇祐間僧常矩建晉

水淵法師開山內有懷晉軒蓮池瑞像機雲故宅高閣

層巒鶴雛秋曉雲西雙松六景後廢爲軍營

梵修寺

在普照寺西北隅宋淳熙間僧義聰可賢建淳

祐中賜額今久廢

敕賜雲峯寺

卽本一禪院在府治北門內瑞鹿橋東中

峯志云舊名北道堂後改眞淨院宋乾道中建至元間  
宋宗室趙孟頫版中峯禪師於此改本一禪院是爲開  
山之始

國朝康熙四十四年

賜今額嘉慶二年知府趙宜喜捐修寺有宋趙孟頫石刻  
遺蹟又有中峯禪師像孟頫書贊又有孟頫戴笠像李  
昭道製瓜裏佛詳載中峯志

元楊維禎記 本一庵者宋乾道中邑人沈氏之所  
建也歲久業廢至元間昌公月麓復其見侵之田撤  
其舊屋而一新之又慮後之嗣者或相踰越也定爲  
甲乙使主庵事延祐中昌寂其徒存禮懼已弗克肩  
事求其才且賢者主焉時善應庵空林果公行業峻  
茂有聲遠林延致之居已上事無鉅細悉歸焉果公

度弟子曰淨開淨譽善實等凡十人乃命開以師事  
已者事禮益相親睦願舊屋福隘無以館學者由是  
拓舊制殿中立大雄氏像其旁若僧堂籌室山門圓  
通眞武之殿燕居庖福之室靡不完具題曰本一院  
果寂開以次主席開之後譽繼之以讓實實介方外  
友天目明公徵文以記子來松值兵燹之後求梵刹  
於城內外不啻百餘區匪夷爲焦土則穿漏爲四虛  
之亭而獨本一巋然於瓦礫場中人以爲祖師願力  
所致而亦譽實之功遂書諸石果字空林雲閒人嘗  
參天目中峯本禪師機鋒相直遂超元窟實字性空  
亦雲閒人通內外典及世諦人  
稍蘭奢云至正十一年夏六月

國朝

沈宗敬重修本一禪院記略 茸城郡治西隅本一  
禪院宋乾道中賜建眞淨院舊址也向有北道等堂  
供奉眞武最靈應元初宗室趙孟憫佐文信國開府  
江浙信國北去王孫遂來雲閒託迹黃冠棲遲偃息  
於堂側尋販中峯大師薙染爲僧法號月麓由儒而  
道由道而釋自號三教遺逸就堂改創祇林精舍煥  
然一新從弟翰林承旨松雪公手書本一禪院額歷  
年旣久榱棟朽蠹殿宇雲侵若不及時整頓勢將湮

洵茂草主事解宗師為超然法裔發大願力矢志重  
壽日與輝庵和尚講求續承月麓空林超然諸禪師  
遺緒康熙癸酉夏募緣興修庀材鳩工不三年  
告竣解師乞文紀其事用勒貞石以垂不朽

幻住山房

在殿後東偏中峯與月麓昌公公弟孟類講  
道小憩之所中峯在處結茅皆名幻住遂以

之名

雙松堂

在院西趙希逸寫  
雙松於壁故名

清夏軒

延祐庚申幻住老人自書今在  
龍門寺嵌壁並有幻住畫象

梅影軒

壁有吳仲圭畫墨梅仲圭與雲林大癡訪  
中峯遺事霜晨月夕信宿而別故有遺蹟

古毫泉

中峯樞弁山時老漁得雪溪片石有蝌斗  
文古毫二字後至院鑿井甘潔因以為名

呂公禪

在院內宋有回先生者過院植樟一本於雲堂  
後數年復來問章公安在鮮知者時樟已枯萎

取瓢中藥一丸瘞根處樟復榮每葉有瓢痕知  
為呂祖仙師自是雲水往來必掇其葉以稱奇

呂祖題壁詩 方壺員嶠是蓬萊仙士原從此地來  
請入松檀薦芳茗羽衣相映碧桃開

中峯禪師像

為在院內師杖錫雲閒宋宗室趙孟頫出家  
為月麓昌公與從弟孟頫禮師座下共鐫

三人小像於石明董其昌  
陳繼儒孫克宏皆有跋

元倪元鎮題 東南倡道據禪林諷詠蓮心契本心  
善矣不塵仍不染美哉如玉復如金三周妙法青關  
窟十丈開花玉井岑今日仰  
師猶古佛風波回首一長吟

敕賜禪定寺

舊名瑞應教院今呼小北庵在雲峯寺左

宋淳祐四年僧成從善游雲閒超果第一山觀瑞光登

井金鰻示異因募是地創院比邱貽光為山主明正統

丙寅始建山門張宗熙有記辛酉孫文幽文旭鼎新元

通寶殿方丈等室成化中重修錢溥記

記云庵地為十  
百十一學論花

國萬歷五年僧居素建彌陀殿於後鑄接引佛一座高丈許

國朝康熙二十四年

賜今額四十四年

御書般若相三字扁額

南禪寺 在府治南宋崇寧中張頭陀卜築於此盤地得住世羅漢像邑人異之遂爲施水庵後頭陀爲僧名普願請額於朝紹興二十九年賜名演教禪院後改今額元大德閒中書馬左丞榜其門曰南山勝地中有緣筠樓雷音堂爲在城諸禪之冠



國朝康熙門提督楊捷重修大殿嘉慶元年知府趙宜喜

重修雷音殿

元翰林學士閻復南山勝地記略松江府南禪寺  
為在城諸禪冠唐元和間船子和尚過而合爪曰此  
地形勢最勝願來興福時未省其語至宋崇寧有願  
陀張氏即其地而廬焉掘井得羅漢像十有六願異  
之後以掩骼賞不受換牒為僧實名普願而船子願  
來與福之言始驗願雖草創數椽久廢歲在紹興得  
俊公而復興請於朝為寺南渡百餘年寺門終未光  
顯入元踰三十年住山如寄驛寶公來住此山增葺  
其漏僅完備每出入是門徘徊四顧西則儒老二  
宮頽頽爭先寺敝然退後若有物壓其首東則牆垣  
塞路斗絕築底若有物障其目南則斷流如綫過橋  
民居櫛比隙不通軌若有物橫其臆思欲挈山門而  
東之規模定在胸中凡三四年始克就緒舊有大石  
龜踞跼水疾輦致其左背負崇墉若鼇戴山而前并  
也入門不數步東南築小土山植松其上若虎伏林  
而旁衛也兌水來其西巽風避其南練以矮牆夾以

佳植委蛇曲折漸入禪境見者生歡喜心咸謂布置之巧獨未有顏其門者大德中寶公輒以南山福地四字乞書於中書右丞馬公而船子此地最勝之言又驗夫地不自勝因人而勝向也行卽面牆入卽窺室門外曾不容數騎一轉移閒縣南而東舉目卽見山門縣門而入林影陰翳若行詰曲山徑閒才見有寺地雖勝因人而益勝固無怪也獨怪船子和尚距今四百餘年前後如此其驗安知昔之願今之寶非船子身後身耶大德

改元夷則月望日

羅漢井

張頭陀鑿泉甘而冽越四百四十年嘉靖丙申

井之陞

惟水泠泠止不波兮使我心平養之不窮兮弗羸其瓶終古不改兮同其清

定僧塔

定僧不知何代人將示寂時覓巨缸二端坐入定合兩口而植樹表之樹已大十圍蓋幾百年

矣達觀師指前樹曰此下有定僧衆不知解已而居人何姓者穿圓深五尺許忽得石板發之見滿缸皆亂髮

其下果坐一僧見者駭異亟閉之

北禪寺 在府城內東北宋紹興閒僧法寧建又名馬嶠

寺元燬明洪武中僧慧海重建萬歷四十五年郡人錢

龍錫倡修後廢僅存石刻四面觀音像

國朝乾隆五十一年僧海闊募建三楹

明沈愷重修寺記略 馬嶠寺居郡城東北故名北  
禪宋紹興閒僧法寧自沂州馬嶠山淨居寺航海至  
青龍有章氏往迎至此發地得古碑云大唐禪寺又  
得金剛天王像因建寺焉縣令柳君約請今名元燬  
於兵至洪武中僧慧海重建有大雄殿天王殿金剛  
殿又有法堂有方丈有放生池有施食臺至廊廡齋  
室靡不畢具其地寬衍悠邃爲吾松一大叢林歲久  
雨凌風震諸梵宇以次傾圯所存者僅一大殿與二  
三古樹非復昔之馬嶠矣嘉靖甲寅東夷不靖有司  
輒於此駐兵戎馬蹂躪鞠爲榛莽僧是榮薙荒理穢  
稍稍重葺會僧雪庵來自西蜀慨然興墜舉廢余草  
堂去寺不百步禪居密邇隨緣聽梵可朝夕往來不

待雪庵之請  
而樂爲之書

### 北禪雙樹

明陸樹聲詩敘 馬嶠古刹歲久漸圯地爲居民侵蝕者半獨殿前雙樹屹立度僧臘無算兵後官司取材議及焉余護存之他日過寺寺僧是榮引余讀舊碑出雙樹下顧余曰是木向微公幾已化去今清陰宛在實仗公再來緣願一言貽山門因題識廡壁以戒芻牧 歲久香臺半劫灰斷碑遺蹟掩蒿萊回看雙樹問僧語此日清陰是再來

東禪寺 初桃花庵也宋時蜀僧性空憩其中紹興初僧

因卽其地開山六年賜額寶勝禪院後爲寺以居府東遂名東禪明洪武中陞爲叢林隆慶元年僧天霞建天王殿青蓮閣萬歷間僧碧空重建西方殿每歲有司迎

春於此駐焉

國朝乾隆四十八年僧玉泉募修

按范濂據目鈔云東禪寺折為庵曰寶勝隆慶三年有海雲僧名圓濟者自靈隱游錫慨然圖維新之因謀於陸宗伯從有司請帖修建宗伯為記即命余屬草云云據此則隆慶三年修非隆慶元年也僧圓濟非天霞也其後復陞為叢林未知何年舊志均略

清溪亭

元楊維禎記略東禪寺僧文友號松岩道人喜讀儒書多識前賢往行一時士大夫樂與之遊嘗築亭寺之西偏臨水時花竹過寺者必訪松岩而松岩設酒茗必於亭亭之賦咏且成卷矣然亭不以松岩名而名清溪者蓋清溪其師函一之號也予聞清溪以吾儒寄迹墨氏而不縛墨氏律日與士大夫飲酒賦詩非蔬筍末流所能窺也亭創於至正丙戌成於是年之秋明年七月記

興聖教寺

在府東南穀市橋西雲間志云按孤山間居集載興聖院結界序漢乾祐二年邑人張瑗之子仁捨宅爲寺本名興國長壽祥符中改覺元院後改今額寺有嘉祐中賜藏經陳志云明頌蘊法師開山地縱廣踰三十畝東有水陸池南有浮圖四面九級有鐘樓高及浮圖之半廉級峻整他郡所無鐘聲洪亮聞數十里元季寺燬而浮圖與樓獨存明洪武三年知府林慶以其地三之二作城隍廟寺僧道安原珍卽廟南建懺堂附塔而居榜曰興聖塔院正統十二年周文襄公忱巡撫至松憩此僧善昌募助重修萬歷間僧大振斷臂修塔

二十七年署丞顧正心復修鐘樓置田以贍司鐘者

國朝順治十七年同知劉作霖捐葺鐘樓提督梁化鳳施  
資修塔乾隆三十二年僧慧誠募修浮圖嘉慶五年邑  
人沈虞揚復修鐘樓知府趙宜喜爲記

朱北礪居簡大悲閣記 具千手眼若兩目兩臂而  
不自多登地以前未易議運兩目兩臂若干手千眼  
而不自少等覺妙覺則多多益辨過此以往卽佛地  
無量聖身歷塵沙劫作所難作辨所難辨從聞思修  
入三摩地獲二殊勝始一目二目而千萬目乃至八  
萬四千磔迦羅目一臂二臂而千萬臂乃至八萬四  
千母陀羅臂目自鑒覺而不知鑒覺手自執提而與  
執提忘各安所安不相違礙手眼可盡其應無窮如  
風行空吹萬不同或不鳴條濤山撞春及其止也土  
囊孰封如月初上清涵萬水影分無數月豈有二及  
其入也銀闕罔閉如春在花如意在弦意兮不傳春  
兮不言磴洞小知斟酌聖量如囊流瑩擬熾燎原又

知敵空欲諸金石不知人人團具此妙借燈王座初  
非高廣大莊嚴藏本無關鑰紹興九年十月華亭興  
聖寺火千手跟大士歸然瓦礫中命婦衛氏載之歸  
居無何夢女子謂之曰盍送我還覺而異之燒香拜  
像前憶夢中女惟肖錫吉護其入置諸僧堂乾道初  
議整殘缺大參錢公良臣實爲之倡寺僧悟相其事  
像復完好光燭霄漢行恭慧輝者迹光所自得之於  
蓮咲右趾聚族而謀曰洪覺著靈陰翊孝治宜崇閣  
以尊事若雲淨藏如瑩躍然相和未幾恭與雲皆先  
逝瑩曰逝者如斯未嘗往也願借一臂力以畢予志  
自淳熙初訖嘉定癸酉嘉平策勳勤苦三十年乃克  
承奉大士於中複道上安三世佛藻梲粲霞丹楹煥  
月翼然橫陳出雲雨上諸莊嚴事莫不偉特宜考績  
而嘉成功故繫之以辭曰泠泠兮載熹炎炎兮廩而  
山移兮數莫移玉石兮俱焚玉兮溫其錢之信由衛  
而敬信既孚所敬者盡載飾兮載完光奮夜兮斗寒  
碧瓦層翬複道兮雲齊納月兮璇題煥金碧兮陸離  
同盟兮安之如瑩兮一夔紹定三年歲次庚寅九月  
甲申朔



元任叔實修興聖塔記略 興聖寺在府治東南漢  
乾祐二年鎮東將軍張司空子仁捨宅建也山門外  
甃石爲梁其南步石梁而西有塔屹立如空中住其  
高若干丈九闌四面崇峙而方縱廣正等宋熙寧元  
祐開賜紫沙門希玠與如納如禮協力建置歲久甃  
瓦頽蝕丹堊剝落四方瞻仰或怠或慊至元二十年有  
一僧行高竭囊鉢之入葺而新之大德五年行高  
逝清裕主之明年七月颶風大作塔不得完上而相  
輪下而闌楯挈入空中墮擲如葉裕歎曰當吾世而  
塔廢之不可也乃出資剝爲倡衆緣駢來輒瓦泥土  
車進舟輸甃補加密椽栱闌檻雲擁星附雙珠七輪  
插在危金繩寶鐸縣在瓶九疊崔巍千燈周帀丹梯  
上通白蜃外飾中增如來座層立菩薩神天殊特妙  
好視創始爲有光旣成鈴鐸揚聲山河倒影神光千  
丈曉夜發露戍守之士瞻拜失容可謂偉矣清裕師  
有精進心爲殊勝事一塔之成豈以爲力哉遂樂爲  
記之

寶雲寺

在亭林鎮初名法雲在市西北唐大中十三年

建晉天福五年湖水壞寺始遷於今所其地卽梁顧野  
王故宅寺之初成有野王顯夢事因祠爲伽藍神其詳  
見記宋慶歷六年重修治平中賜今額明洪武中僧戒  
智重建天順六年僧德津重修錢溥有記寺旁有石幢  
名楞嚴塔唐咸通二年蕭宏書陀羅尼經刻石

元牟獻重修寺記 顧亭林湖在華亭東南三十五  
里湖南有顧亭林顧野王嘗居於此因以爲名具載  
圖志其地今爲寶雲寺本號法雲在顧亭林市西北  
唐時爲大長者吳仁約楊師厚買地於此立毘尼精  
舍二上士入京請院額遂賜額爲法雲大中十三年  
寺成天福五年以水潦遷寺於南石晉開運元年十  
二月始畢工寺之徒二人同夢金紫一偉丈夫云是  
梁朝侍郎若有所屬然明夕又同夢且告以斷碑處  
晨起尋寺基果見片石水次引繩出之已殘缺僅有  
十四字曰寺南高基顧野王曾於此修輿地志衆始

駭愕乃卽寺東偏立祠奉之顧公朝代隔絕死而不  
亡發於幽夢未可以怪誕疑之考西漢有馮野王列  
九卿性剛潔公字希馮蓋慕之也晚歸陳朝撰輿地  
志三十卷此云修志意卽其時也陳宣帝時除黃門  
侍郎此云梁朝不忘梁也劉晉嘗稱天福十二年以  
與石晉異歐陽公非之此天福五年卽唐天福也皆  
有關於寺及斷碑因書之使觀者無疑焉王介甫梅  
聖俞嘗有詩記顧公遺迹亦不及斷碑事蓋一時暫  
遊不及考靈鑑等記耳宋端拱時邑人胡彥珩與修  
治平甲辰始改法雲爲寶雲淳祐戊申景定庚申相  
繼營修庚申之役最爲壯麗元陸華亭爲松江府歲  
久傾圯淨月師素習台衡教自雪慈濟待香來歸寶  
爲在持再加整葺辛丑七月有風怪雨之厄盤捐已  
貲自中徂外殿堂門外大作新之號飾其垣墉砥平  
其塗徑翬飛其井亭橫互其石梁頓異舊觀而千石  
巨鐘春容叩擊聲振四遠諸天人諸菩薩圓通大士  
應真羅漢與夫靈山一會儼然未散亦各歡喜乃莊  
嚴其相蠲供具以奉之復期儼以祝之其願力所充  
有以致此丁未臘八日淨月因來求記銘曰宇宙中  
閒萬法咸備此理流通有一無二善教曰佛妙用曰

神雖曰不同歟理則均顧公有祠寶雲是依發幽著  
靈殊塗同歸顧亭之湖餘潤滲漉寶雲之雲奇采紛  
郁洒爲法雨普沾沙界法與理貫無在不  
在至大元年五月望日牟璘撰趙孟頫書

積慶寺

顧亭林市東宋淳祐中寶雲寺僧靜月建吏部

許明奎記

方廣教寺

在柘林鎮唐咸通中建蔡侍郎功德院也宋

建隆中賜額延壽改方廣爲院後爲寺有蔡侍郎祠蔡  
墓亦在寺側石幢猶其故物初寺竝海元皇慶壬子僧  
正滿等別營一區俗呼新寺有觀音像紹興初里人鄔  
氏得之海中嘗見夢於僧法元迎歸事之禱無不應至  
今祠焉

宋釋祖岑方廣寺界相記 方廣院者舊曰延壽治  
平中改賜今額相傳蔡侍郎捨宅爲伽藍然無考惟  
石幢題云唐咸通六年蔡贊助緣耳迨詢耆舊皆云  
自昔未聞結界然其堂宇既周僧徒繁盛獨其尚混  
自然故吾祖云對外道無法自居顯佛法人尊道高  
故制斯戒其徒法勤宗益歎曰既稟戒毀形出處語  
默皆須應法而動豈所棲之地猶居自然在於吾曹  
寧無媿耶由是詣邑中超果寺命比邱祖岑拉二三  
友爲其結界準僧祇七樹之量集僧約五分通結淨  
地取則千壇經重解重結乘唱不落非法行事不失  
其序域地分量可委無作之法徹於金輪災劫不能  
焚蕩豈虛言哉仍以界相刊之於石永爲不朽紹興  
二年十月二十日

平等禪寺 在漕涇鎮西護塘卽唐福田庵址元泰定四  
年僧志建改今名明嘉靖初包侍郎節與弟孝讀書於  
此後燬於倭僧本煜宗城重修構海雲閣萬歷間僧道

銓置田三十畝

國朝乾隆二十年里人蔡襄重修吳宗濂爲之記

證教覺院 雲間志在縣東南一百五十步本無礙浴院

宋太平興國二年建大中祥符元年賜今額

後廢爲司獄司

宋許尚詩 有人明七淨羈沒締良因歎息流風替誰爲無垢人

善應庵 在北門外宋太平興國閒全喜尊者建元趙承

旨書大雄殿額明果實禪師建二殿

國朝雍正七年住持大潤禪師蒙

恩召對嗣有疾辭回莊親王賜法雨均霑額以榮其行乾隆二十四年邑令許治撰碑記嘉慶十七年重修漕帥

許兆椿書人海慈航扁額

寧海庵 在滌闕宋紹興七年建明嘉靖甲寅燬於倭萬  
歷元年興福寺僧靜秀雲重建

國朝乾隆二年同知李天篤重修寺有海浮大士像相傳  
海岸浮一大木軍民百衆不能移一白眉老人云是可  
塑佛像言畢忽不見時一道者以手扶之疾入庵中爲  
塑大士像

寶相寺 在縣西南三百步本清禪尼寺唐乾元元年造  
宋大中祥符元年賜今額後爲夏周二公祠

東報德懺院 在十一保宋咸淳中僧友懽易徐氏地結

庵度弟子普潤爲成勝刹元至大中牟獻有記

西報德懺院 在府南三十里宋達講師建

施水庵 在莘莊鎮俗呼草庵宋咸淳中建元趙孟頫金書法華經在焉明崇禎元年僧聖炯建萬壽佛閣

普門院 在際留倉東其初沼也元至元十六年杭僧普蓮傍沼結廬食三白厲志清修漁於沼者日挈塊土基之由此基丕大一夕夢伽藍神曰詰旦黑白二童子來白者可度已而果然蓮與白者坐白者超坐几上默然曰此人高我因留爲徒名妙淵因成勝刹

水月院 在葉謝鎮元至元閒建明景泰中壞於水成化



中僧福聖廣理重修

元揭傒斯詩 有客款巖扃無人管送迎片雲閒出岫水月自無心

慧鐙塔院 在里仁坊內元大德四年僧智燾建陳志卽

雲漢昭回之閣誤今廢

喜見庵 在府東北七里元至順閒喜菩薩建內有靜寄

軒今廢

蓮生庵 在生生橋西南

白燕庵 在賢游涇袁御史凱墓側郡人顧懿德所築以

祀袁海叟者海叟詩以詠白燕得名董文敏題爲白燕

庵舍人李待問題聯曰春風燕子依然入大海鰾魚不

可尋

尼寺

法雲寺 在俞塘北宋淳熙中郭樞密之子爲其女兒建  
女兄適葉蚤死因誓節爲尼居此故俗呼葉庵嘉定閒  
請於朝賜亭林法雲寺舊額尼名正覺能詩其徒石刻  
一絕以銀填之樹於其塔前

正覺詩見  
列女傳

坐化庵 在華亭學西南相傳有兵家婦居此暑日化去  
越三日而尸不腐提督昭武將軍楊捷夫人臨視遂建  
以奉香火其肉身尙存

修身庵 在府城內慧燈橋西相傳理刑廳舊址嘉慶二年比邱尼德心重建

道觀

仙鶴觀 在縣南二百步朝真橋東始創在橋之西宋紹興三十一年處州天真觀道士葉太真請於朝卽東晉廢觀復建賜今名元至正中道士吳大亨重修明洪武元年以其地設太平南倉道士陸允中始遷於此其地故張氏祠堂也觀雖小爲府境琳宮第一道紀司治焉  
今廢

明邵亭貞記略 松江府治以南二百步有觀曰仙鶴其始建歲月不可攷宋紹興年間處州天真觀道士

士葉太真來爲之主始克充廣之葉有道行善役鬼神嘗奏章與蜀某道士胥會天關事聞於朝乾道間進上陳籠朱飛卿鄭藩等歸其資葉乃樸斲梓材於其鄉浮之濠海以至爲參陽殿前設三門旁立兩廡翼以經鐘二樓後建昊天寶閣又後爲主者之居學者講習栖息之所以至庖藏涸涸一完美請於朝賜東晉廢觀舊額始以仙鶴稱繼嗣失守至正四年掌教天師擇天台吳大亨居之吳通於鬼神水旱疾疫有禱輒應尤善拔致魂爽得其教中所謂濟生度死法者每盛服事帝必有驚鶴翔舞而至有惑人心相與興起益舊址崇檐楹視昔加高廣壯麗增置雷霆之殿將衛之居建祖師施主等祠皆列棲兩廡天人之像金碧煥耀端嚴雍穆落成之明年芝草生殿陛閒觀舊有田若干頃自宋迄今特蠲其賦役尊道教也

吳輔遊仙鶴觀詩 煙霞宮殿隱層層十二闌干處處憑翠館月明仙境寂碧潭風靜鏡波澄中山酒年不須閒踟躕孤雲野鶴在鶩騰

蓬萊道院 顧志在北禪寺東南殿東廡有梓潼神像舊  
祠縣學後有竹林大比歲以筭進室中卜薦士之多寡  
近神座則占前名其驗如響成化六年提學陳選以神  
道家者流非學所當祀道士李朝陽因請祠於此塑呂  
真人像配之又建利濟侯祠正德十四年震雷碎殿柱  
嘉靖初道士衛大溥率其徒鍾秉彝復修萬歷閒俞汝  
爲倡建八仙祠於東偏

國朝乾隆四十五年道士戴儒珍募建梓潼閣明年爲颶  
風所燬里人錢世美重建卽於閣下祀呂真人二十五  
年里人張清源建三宵殿嘉慶十八年道士何丹山募

建利濟侯後殿

明錢溥重修蓬萊院記略 府治東百五十步舊有道院曰蓬萊宋紹興間地生靈芝純陽顯迹因名元至元開道士李德安復建歲久傾圯洪武中金志信重修永樂間陸道祖來住持繼李朝陽戒行超卓道術高妙常以殿宇卑隘不足以壯觀成化初先構兩祠請縣學內文昌像奉於左塑純陽像奉於右勤苦精修不十載四眾皈依遂與其徒江守澄竭力經營撤而更之正殿三間高四丈六尺廣視高倍五丈一尺深倍廣者四丈八尺後殿三間廣與高深俱殺焉正殿真武居之後殿老子居之文昌純陽二祠則從於後殿前之左右利濟侯祠以及山門諸所煥然一新其殿工始之日予致仕還家之又明年也越三載而落成朝陽乃謁予請紀其事正德三年夏五月

元張昱詩 雲近蓬萊蜃氣消數峯晴照遠相招梁間燕子都歸去觀裏桃花自寂寥孟飯化人忘戀戀院牆篁竹漫蕭蕭雲中何處

劉安宅猶有雞聲報午潮

安于道院

在通波門內宋咸淳間王蒲友捨宅建明

啓闢復建關聖祠文昌閣并崇奉溫元帥極有靈驗

盟素道院

在府治東南華亭城隍廟側元至元閒天台

桐柏宮祝知觀創始至正閒道士吳蟾友王元靜建明  
成化五年旱知府田臻禱而得雨命住院王惟端重修  
正德四年道士王大經建三清閣後圯天啓中重修

東陽道院

在縣治西北祈雪街

月河道院

在錢家橋西卽周公堂舊址乾隆四十七年

易今名

錢明宮

嘉禾志在府東張塔橋側今在楊侯廟側乾隆

三十四年郡人方伯蔡鴻業重修改爲崇德道院

紫霞宮 在東門外明嘉靖中建今爲碧霞行宮

西湖道院 在演武場北元至正元年道士邵以中建明  
正統十四年道士計一寧修其地舊西湖也故名猶有  
小渠自太平橋西流折北而匯其前當春夏時蒲柳參  
差鳬雁翔集爲城中幽勝處成化閒道士蔡元靜修王  
良佐記

國朝康熙二十二年提督昭武將軍楊捷重建有記今惟  
玉皇閣殿宇闕壯而院屋無存僅一黃冠司香火而已  
旁有馬王廟不知創自何時每歲神誕武臣於此致祭



焉

魯志稿載有壽國禪林康熙二十一年昭武將軍楊捷建即今玉皇閣也

五色泉

明一統志載世傳葛稚川鍊丹湖上丹成投水中有旋渦甚急小舟經者或沒焉沒而出者謂水甘如飴其下深可十尋有橋商賈舟獲載置舟左右則鼓中則躍去時謂丹化

國元道院

在府南會星橋西北宋時名城南道院元後

至元閒易今名明邵亨貞有記今久廢

鳳仙道院

在漕涇元至正閒徐六萬戶建明永樂初燬

於倭正統閒里人楊振重建

國朝康熙十八年新安汪震重修彭定求記

明張悅重修記

松江漕溪在郡東南七十里許其南不數里即大海瀕海居民以魚鹽爲業餘無所資

每歲夏秋颶風作陰雨晦冥海水缺蕩甚至決隄浸田源毀室廬元至正時有徐六萬戶者憫其民爲海所苦謂海陰以幽而幽則有鬼神宜假威靈以鎮之於是捨基地六畝西距溪二百八十步創祠宇其上奉香火祈禱焉國朝永樂初燬於倭舊基鞠爲茂草幾不可蹤迹者四十載其地之賦則里民王文亨與其子若孫累歲輸官因以其地三之一爲塋墓正統間總賦長楊拯實里中巨擘也欲爲重建白郡守趙公豫可之乃歸命牧者楊道誠董其事卽其基創三官殿復其院之名如故景泰末鄉人陸用初有志爲道士遂出家禮郡道紀李志道爲師成化丙戌請度牒壬辰來住持居無何道誠物故用初獨立募緣不飲酒茹葷謁誠殫慮己亥作玉皇殿作東西兩廡壬寅作鐘鼓樓作外三門庖湍橋井賓客講演之所亦皆以次完美像設莊嚴丹堊鮮麗歸焉奐焉藉爲保障不益久永也哉是不可以無記郡庠生楊傳以生長茲土略述所聞特書其成予雖差長然亦未聞其詳如所謂鳳仙者莫究其義萬戶者莫識其名詢諸故老無所考姑記其大略以告來者

北聖宮 在柘林北門城樓土人云築城時辨方者言啓  
北門不利故建眞武像以鎮焉

奉賢縣

明行教寺 在南橋石晉天福五年里人蔣漢斌造請於  
錢忠懿王始名安和院宋太平興國八年賜今額明萬  
歷初住持養空興建

國朝順治六年僧了赤與徒法明重修

宋釋居簡記略 華亭岡隰載春秋時夫差三女子  
墓田曰三女岡聲詩則橋諸唐令尹詢并荆公王介  
甫都官梅聖俞通岡之利曰安和晉天福五年蔣漢  
斌環堵中芬陀利花擢於陸聚族而謀曰是八吉祥  
六殊勝處盍施諸釋梵家遂基此剎植榦於是考曰  
本立病潮蓄岸址白璞瑣議徙於此改曰明行用惟

海王錢中令歸朝所請之額堂宇樓殿金碧煥燦雲  
樓驚飈月行璇題具如經說凡所當有罔不具藏乘  
二千餘卷棗柏大士華嚴合論在焉鐘梵壓萬竅爲  
一方宅心純想之地遷善遠罪者咸知鄉方一燈長  
明四檀委輪規矩準繩有條而不紊五季方中水立  
晝昏眞人應期民登衽席聖聖授受幾三百年未聞  
識載固自若也云胡惠日求紀述爲日曰故國喬木  
共大蔽雨其高垂雲可無封植日冀懋長風雷之鼓  
盪雨露之膏沐而至此也一剎百堵容數千指功倍  
封植惠戒翦伐人天之所瞻龍象之所懷不啻故國  
喬木罔知創業之難難則將怠乃訓盍講明以詔後  
世不亦可乎因其說系之以辭辭曰五季中民述  
道弗如麋號無天中令君吳越錢奮一旅圖萬全玉  
節勁金城堅王海國遮中原振義聲開福田空寂崇  
經象傳幢剎建泉貨捐爲拊矜持危顛誓子孫銘肺  
肝攜錦繡包山川歸有德同永年帶如河礪如山與  
竺乾無黨侶教差臨安府淨慈  
光孝禪寺住持北礪居簡記  
結界記余作三女岡明行院記於嘉熙初元越二  
年結大界相成薦請紀其事其說曰天可陟吾疆不

可入地可陷吾疆不可犯不吉祥及諸惡律儀自退  
舍於廣莫之野而無何有之鄉且夫天地之大八荒  
之廣從而無際衡而無眡雖吾廬千柱萬礎磅礴川  
谷包絡平野眇而眇之一餌耳吾身小天地濶乎方  
寸者心也至微也至幽也出入無時莫知其鄉三災  
彌淪心爲本根不組其根滋蔓罔旣乃於是中自燔  
自溺然則界相在此而不在彼曩記錢唐大雄院創  
建之顛末嘗究其說矣今此舉行墜緒補有寺以來  
闕典故申言之且嘉其事法精至而秉法攝僧攝衣  
攝食唱相錫膳與波羅提木人絲毫不忒皆寺之傳  
教比邱惠日講明而奏厥功乃策其勳而系之以辭  
辭曰善乎明行大界相之結也彌滿清淨於其內  
他莫我干也噫結固易與爾守難乎哉傳曰重門擊  
柝以待暴客備禦侮也匪擊柝戒嚴於其外則猾闖  
狡關強侵暴陵重門果何恃譬夫倚界相之固不希  
勝進般樂怠傲習燕安之鴟自以爲安室利處忘自  
吾所敢知非

釋慧日題院中白蓮花詩 神佛何由測芬陀陸地  
興素芳呈玉雪梵刹聲邱陵換額從偏霸縣牌自老

僧殷勤勸來者

期使續千燈

趙崇森和

舊址來從晉中開幾廢興一蓮開陸地

三女臥岡陵題咏誇前輩流傳得主僧林深鐘梵寂

長夜月

明燈

高子鳳和

地產枝蓮異禪宮自此興殊祥天不斲

奇豔雪堪陵

魄化疑吳女碑傳有蜀僧何當尋勝槩

吟斷佛

前燈

慧日又題

白羽芬葩陸地蓮可曾搖曳水中天肯

於素豔分新潔不與紅酣鬪碧鮮玉井無因期摘實

金園有兆必先年應知瑞與

優曇竝一朵騰輝萬古傳

### 崇福寺

在蕭塘宋紹興四年請額

元于文傳修寺記略

華亭東南四十里曰蕭塘有

寺曰崇福始宋華嚴可師之所建也師姓喬氏諱從

可族大而蕃往往以科舉登顯仕師獨不屑為乃求

出世之道方服以往以事佛紹聖元年甲戌捐宅為精舍

規模僅就粵二年丙子其從大父參政涇復以故第  
益之由是始充廣凡寺之制爲一方勝刹皇元混一  
以來歷五十年雨凌風震日就頽圯至治元年桑門  
友聞來主是席慨棟宇之將推祖業之不振惻然曰  
是豈非後人之責與乃首傾己貲倡以大義凡寺之  
書宿與夫鄉之好事者靡不樂助於是輪奐一新金  
碧交映視昔有加焉工既訖功將退處閑寂衆請曰  
茲寺自紹聖迄今二百三十餘年未有文以紀其實  
今幸不墜宏基克成先志其可不勒之堅珉以垂不  
朽乎聞乃謁余求記予觀世之學佛者僥倖得志於  
一時未有不極其所欲以爲之奉少不如意則廣徒  
固權搶攘剽奪視佛祖之教蔑如也尚何望其肯構  
哉今聞也始涇茲席則以葺復爲己任功告成則浩  
然賦歸其志良可嘉矣予旣重違聞請又將激夫後  
之尸厥位者故爲之述其事以紀歲月云承務郎平  
江路長洲縣尹兼勸農事于文傳祺按淇水流慶  
錄從可乃涇之從大父紹聖丙子至涇登第歲八十  
八年記必有誤涇之捨宅當在嘉定丙子時已爲參  
政非紹聖也

志嚴庵 在金匯橋東宋淳熙閒僧守端建明萬歷中僧性方置田

國朝乾隆六年僧素恆重建

圓通庵 在十三保宋咸淳中道者明無創建其徒明空成之明永樂中陳祭酒詢讀書於此萬歷中僧性德海受重修

友梅講院 在蕭塘鎮東北宋時建

國朝康熙閒僧心則修二十二年僧覺坤募修

映海禪院 在高橋宋祐聖殿舊蹟明嘉靖閒以鎮多水患裴河夏時覓募建鐵佛六長丈餘以鎮之今稱鹽倉



禪院

國朝乾隆九年青村場莊楚寶暨僧鶴賓重修

資福寺

在梁店元至元初建

邑志

永寧庵

在十三保明永樂閒陳楨捨地建

莫蘇庵

在孫家橋元至正閒僧善慶建

純陽禪院

在陶宅明餘姚謝遷讀書於此有謝遷碑記

三祝庵

在青村港明萬歷年建

瑞芝庵

在浦東泰日橋明錢士貴建因地生五色芝故名

名

浦雲庵

在東新市北明盛鴻倡建御史宋賢記

護心庵 在十五保三橋明崇禎閒僧海明建里人陳達  
朱周助田九畝

臥龍庵 在十五保明崇禎閒宋琬與弟道昌道曇存獻  
同建知府方岳貢題額

寶峯庵 在百曲港僧行微道宏建

貞靜庵 在牯港南僧超凡建

華嚴庵 在沙岡東四面皆河頗極幽靜

旭陽庵 在十五保拱際橋里人楊可任建

毘盧庵 在半岡東爲何氏家園

賜子庵 在十四保僧寂玉寂孝建宋慶長記

廣福庵 在十五保里人宋宗憲宋際爲僧道溥建於塔庵 在胡家橋北創建無考相傳舊有塔久廢

國朝康熙間僧重壁改建

國朝李登瀛記

我松東南扼春申浦迤邐三十餘里相

傳有於塔爲唐於氏所建至宋元豐四年設廟以界地久則廟存而塔廢時代縣邈志乘闕略故不甚顯今重壁上人以宏願鉅力恢拓廟宇復勒諸貞珉傳示不朽豈非法門龍象哉上人名恆心系出旌德十齡失恃隨父雲間爲苾芻蓋達微隱公之法嗣而自明覺公之法孫也

國初有元舟禪師自滇中難足山來戒行高潔里人敬奉之自公從受衣鉢禪師示化自公結趺於茲隱公重公以次隨侍焉廟隘而敝器用不具重公次第鼎新色相莊嚴締構完整復置田以贍香積蓋師弟繼承逾三十年而稱東南精舍焉易廟爲庵從本法也仍繫於塔志不忘也至於建塔之歲於氏之名郡志勿傳俱不得而考云

善慶庵 在十四保蘆葉港南康熙閒鄔安國等重建有額曰退居小築人遂呼爲退居庵云

祈福庵 在楊王鎮北里人陳照澄建

法雲庵 在高橋鎮北

聖果寺 在四團鎮僧見性募修

大悲閣 在明行寺後嘉慶十年邑人內閣中書陳廷溥倡修

寶凝庵 在新塘鎮里人何躍乾捨地建捐田五十畝

碧筠庵 在青村與三祝庵相望嘉慶十四年朱翁氏捨

宅建

萬善庵 在益村壩里人蔡丕勳重建

重建萬善庵記 蓋聞華嚴富貴梵剎固重首基象  
教光明願力尤資繼起何則創之者開其始修之者  
總其成也況乎昔時梁紹錄兩全非今日旃檀金錢  
誰布苟拓雙林而重建卽美一姓而非私何必申浦  
南來尚說名藍之舊蕭塘東去向推衆姓之功也哉  
益村壩向結茅庵載之邑乘相傳宋元間建中供地  
藏左廟城隍右官武聖舊額本是圓通今庵統稱萬  
善一修順治某年半係憐陽之力碑石猶存再修乾  
隆某年厥惟上蔡之功資捐獨任蔡君培風篤桑梓  
之行結香火之緣顧此僻左廟址未宏於是就其東  
偏先施創造新殿楹以軒敞喜寢成而孔安先是君  
曾獨建景福綏祿介壽三橋廟在介壽一橋之址碑  
亭附焉君姊適文學曹衡山守節合例君誼隆煮粥  
費脫縉錢力任千金請旌創建是用烏頭綽楔蘭  
若相望望絲雨綸霞女夢承慰飄月中之清梵亭枕寒  
流聳雲外之高標坊通覺路法輪常轉福地改觀昔  
庵何如今庵萬善統歸一善可謂發無盡心可謂結  
最勝果圓成一切普濟十方卽非洛陽之伽藍直擬

平原之家廟用鐫貞石以誌方來嘉慶二十年歲次乙亥三月奉邑外史王作謀撰

漳泉寺 在三官堂鎮里人胡含貞等增建

尼寺

寶明庵 在竹岡西乾隆十八年比丘尼本定募建

道觀

老子廟 卽伯陽庵在十五保明正德閒周鈇建彭開祐有記

西真道院 在南橋鎮相傳宋時建

國朝康熙初道士杜景淳架閣五楹乾隆閒吳文光募建門樓添建兩廡側樓河岸貼石防頽規制始備

沖和道院 在青村元至元末陶宗海建

國朝康熙五十年修

上真道院 在翁家莊元泰定二年道士蕭野雲募建明

季鴛湖道者李白重修

國朝雍正二年道士張尹疇復修其徒蔣雲山募建斗姥

閣於東偏

昇真道院 在法華橋元至正閒道士郎道一建

太興道院 在蕭塘元至正中道士范道隆建

丹真道院 在明行寺東康熙初鄒廷麟等建雍正六年

道士褚諤廷重修

創真閣 在阮巷東市乾隆閒張超等勸建嘉慶三年蔣

汝淵等重修

婁縣

超果講寺

在縣西三里

顧志府西南瑁洲橋之右

本名長壽寺唐咸

通十五年心鑑禪師造按唐會要洛陽伽藍記武后以

齒髮既老造長壽於東京改元長壽又高僧傳載心鑑

禪師藏奐蘇州華亭人大中時復修洛下長壽寺敕奐

居焉奐後歸鄉造寺治平元年改今額寺有天台敎院

芝園集載雲閒超果十方學校香嚴湛創建

以上見雲閒志按雲

閒志第二卷仙梵內引高僧傳載藏奐以咸通七年示寂於天童此云十七年造寺與本書前後不合疑寺不



始自藏輿因長壽二字牽合其引盧仝詩以爲非東京  
長壽尤不足置辨雲間志一書爲圖經脈最且傳鈔譌  
脫並非足本有謂修新志不元末燬於兵洪武中主僧  
如刻舊志者乃強作解事也景祥重建歷祥耐大與德奎宗尚各有修葺至正受而  
備夏寅有記宏治後僧文錫道俊智洪亦遞有修葺天  
啓末一覽樓將傾郡人侍御王元瑞捐資重建高廣倍  
前里人顧圓僧成兩董其役崇禎九年落成章台鼎記  
國朝康熙四十四年

聖祖仁皇帝巡幸松江

御書虹光勝蹟四字扁額賜之乾隆四十八年釋際巖重  
修大殿復次第募修雨花殿天主殿一覽樓而其地頽

圯頗甚然規制宏敞猶爲雲間第一山云

宋陳舜俞天台教院記 天台氏之建化也以觀心爲法以念佛爲宗教觀心者觀有心以至於無心念佛者念彼佛以證乎我佛或升階納陛同踐堂與或順風乘航橫絕苦海眞可謂大乘之淵源導師之方便者矣原夫清淨本然無有空假因緣忽生萬法以起河沙妙門一念而足所以體同寂照神具樂域邱陵坑坎悉見嚴淨衆鳥行樹皆出法音用之則然何遠乎爾佛塋肇基神化周浹諸方回風緣應如響則夫來四衆之珍聚建六時之白業棟宇具而神人安鐘梵作而齋戒修又可闕乎秀州華亭縣天台教院者蓋鶴唳之奧區寶龍象之精舍先是界相東南地隙草樹時和年豐民有餘施師徒日演廣廈斯作講誦未聞人莫知響法師惟湛台嶺之宗實爲苗裔言厥遊方韋來胥宇旣以知見提撕其新學亦用方便誘掖於里俗於是檀供旁午規模備具復卽淨室作西方彌陀之象其高十有六尺巋然垂臂若將援溺以應經量邦人吳延宥善施樂義乃爲捐金以極塗飾然後居者有以系瞻誦之愬遊者以之起師仰之願

揭像應之雄規畢空門之能事矣嗟乎誰爲布施爲  
住於相應之雄規畢空門之能事矣嗟乎誰爲布施爲  
本流轉生滅莫知攸止故夫信捨作則執著亡執著  
亡則空寂見空寂見則佛性具矣誰謂聲色不足  
見如來今夫金山之聚不輟乎吾目和雅之音不  
平吾耳塵法雖外其心則我苟無聞見則無我佛  
夫樂苦空而斷因果厭諸相而求解脫未足與語  
者也院饒大成嚴像且畢以僕夙體斯道見屬隨喜

云熙寧五年

正月辛巳記

元楊維禎重興寺記略

雲間超果寺有大士像郡

志以爲錢王時宮中所奉像也夢感於王欲適雲間  
王命慶依尊者奉像往時主寺者釋聰於像未至前  
日三日内當有主公至至期果然像初至李塔庵去  
寺十里近髻上有光貫於寺西井井有金鰻放光相  
接若虹霓然今名瑞光井者是也宋理皇書賜額曰  
超果靈感觀音教寺景德甲子寺災僧惲孫者抱像  
投井得完至正丙申寺載燬先一月像夢於老衲曰  
寺不焚者廚堂之間可徙我座僧行緣者抱之出郊  
後廚閣果存閱三年己亥夏寺主僧澈自佘山輟席

至募遺施建殿位置聖像已而創山門造橋亭築垣  
召樹藝花果又復發田五十餘頃招徠信眾修起  
具廬於是靈像具而法社存邑人士女暨境外縉素  
奔走請教微惠於水火雨暘男女無虛日吾聞石晉  
時上竺僧道弼得奇木刻大士菩薩像白毫光煜於  
晝夜瑞相之託靈於錢王宮者無足怪也然辭去宮  
邸必之雲間白衣大士亦擇地而處乎得其所託闕  
三災而像終勿墮則於地理亦有關乎今超果得人  
而靈迹益著不在於微矣乎雖然不逃生滅者世相  
傳也瞿曇於世間相中不生不滅元黃不先塵墨不  
後雖有聖智莫盡其際若是則求蹟於有像示現之  
際者兒婦人之近也像以幻出幻以妄用以幻用幻  
以夢占夢吾將於瞿曇乎叩其覺也澈曰惟其幻也  
論我生滅皇覺我幻不生不滅吁此未可與兒婦人  
道也予以其言得象外指於是乎書澈字靈源冰雪  
其高號者宿僧有功於土木者誠也瑛也至正甲辰  
夏

國朝

黃之雋重修大殿記略

超果寺自唐至今垂九百  
年郡志基詳然尚有關疑志載寺基本澤河有異僧

日憩其上使羣兒以瓦礫投已不中盡入河遂滿因覆土結庵後爲巨刹則在藏奐創寺之先未詳異僧何代人也寺建於唐咸通十五年咸通止十四年方外傳奐以咸通七年卒則未詳寺實咸通何年建也寺始名長壽宋英宗改今額東爲天台教院以院與寺分未詳何年合也理宗書額曰超果靈應觀音教寺今日超果天台講寺未詳何年易也志載元時寺有塔未詳何年廢也宗景定五年寺災元至正十六年再殿中間九十二年未詳重建何時興修何人也寺之大殿俗稱鴛鴦殿以形制兩殿合一而名殿之不修久矣乾隆八年隱錫庵僧明智過而心動倡諸善信或解囊或募貲或給匠勞與費借肇工閏四月之望迄十月望而圓通大殿告成十二月朔雨華殿亦一新夫造化乘除天地理數之自然無而之有者造也有而之無者化也歸然斯殿一寺之觀聽繫焉因其有而有之如創如造沙門檀施以其財力爲功德善矣琢石鏤辭昭示將來寺之勝次第興復咸自此始也

見遠亭

遠橋

宋李景元超果教院見遠亭詩 高僧欲縱目橋上  
建橫亭野水茫茫白羣峯點點青 客帆風送葉漁火  
夜遣星看盡朝昏  
景天涯一畫屏

瑞光井 在寺西廡下事  
見前楊維禎記

### 一覽樓

元陶宗儀登一覽樓次林泉民韻 層樓明敞奠松  
關萬里蒼茫指顧閒地絡柳峯和梵塔天低溟渤獻  
神山寶陀像設金千鎰瑞井光涵玉一  
環倚遍闌干吟未了迦陵風細韻縣蠻  
明夏原吉詩并序 永樂甲申予奉命發廩賑華亭  
民假館起果西軒乘暇攝虛中法師燕百和香登一  
覽樓闌窗遐眺三泖九峯舉在目睫真雲間第一境  
也推金鰻不躍青虎無聲可為長恨遂命筆為七言  
律詩一首 我愛雲閒第一山登樓直倚最高欄金  
鰻不起泉光暗青虎長眠墓草寒雨歇九峯爭獻翠  
風回三泖遠呈瀾脩脩白髮  
賢公子還肯分猷似鑽殘

知府黃子威和樓外湖光燭九山偶因公暇得憑  
關仰思任重恩難報俯爲民憂膽易寒煙散林稍縣  
霽日風和江澳偃狂瀾尚書詞

翰存芳潤屬我登臨興未殘

錢溥和金鼇海上涌三山紫翠平分到盡闌景撫

鶴亭和淚斷草封鰓井夜光寒不才自擬將頽日有

力誰回旣倒瀾感慨一時

歸去後祇園僧定鳥啼殘

夏寅和相國南巡愛九山詩情爛漫此憑闌一言

悟主民財阜三尺持公吏膽寒王業有才先翊運道

源無力後揚欄尋僧幾度

觀詞翰重惜銀光片紙殘

袁凱和湖上雲帆渺上山無邊風月曠憑闌波涌

秋影鶴灘遠天接瑞光鰓井寒花雨滿臺霏白晝石

梁當寺障清瀾老僧留我

登臨久不覺楓林日又殘

兩華殿在鴛鴦殿後明天啓初重建後爲千手觀音閣

南爲如如堂左右東偏名有樓西爲禪堂殿東廊有鏡碑

北爲西隱堂僧如霖募善信楊泗建閣供定光佛舊勝

三聖之設嘉慶丙子住持  
祖性監院品端募化重修

西來堂

舊有四賢祠吳太僕祠遷於堂之東偏

雨華堂

在殿西北元末兵燹明萬歷中王侍御元瑞讀

每月結蓮社於此李通政凌雲屬宏祈嗣連舉三子復

鼎新其堂及香積廚前有放生池董宗伯陸司寇書額

天王殿

任公怡庵左為綠漪堂王侍御元瑞宴憩之所

四賢祠

祀陸機陸雲張翰顧野王石門宋旭禪栖於其

配日後  
四賢

廣化漏澤院

在超果寺西北宋崇寧中僧永珍建紹興

三年請額明正德七年修萬歷十七年又修

國朝乾隆十年僧塵超涵明復完葺之中有法林堂安禪



室普光閣明靜軒

宋許尚記 宋有天下垂二百年龐恩厚澤參漑乎  
宇宙崇寧大觀閒治至極矣方之成康文景之世不  
是過也九重之心可以釋然矣然猶未始一日忘乎  
民也寬大之書欽恤之詔未嘗虛月焉天下之人無  
橫征暴斂之虞獄犴不平之歎而九重之心猶未已  
也慮天下之窮民或耄且病則俾與之醫學以全完  
之饋粥以生餒之當是時無一夫有無聊不滿之意  
而九重之心猶未已也痛民之或死而無主將不免  
於暴露也則救天下郡縣卽開隙之地俾得占瘞而  
錫名曰漏澤則天下之人無委壑之慘矣九重之心抑  
猶未已也又聽其佛之徒廬其所由歸也皇乎仁哉華亭  
夫魂之所升而慰夫魄之所由歸也皇乎仁哉華亭  
超果寺之北有地焉可以掩骼而埋胔道者永珍姓  
葉氏來自赤城萬年院一驪比邱也適奉是詔乃請  
於其地主林珍珍從之又請地於童叻叻亦與之由  
是漏澤之園成矣其徒顧善明亦以道者瘞斂如旨  
而得度牒紹興初住持僧曇秀始請於朝得廣化之  
名屋纔數椽門廡卑陋抱閭不具不足以稱名院之

意太師郇國章公之後曰欽若嘉秀有興拓之志乃  
割薪未以助之且以申追遠之意秀與其屬景仁法  
欽景倫景佐子元宗遠合謀勦力闢而廣之翬飛輪  
奐猶一望判然我嘗溯珍之始爲是圖實崇寧之二  
年越三十年始賜額於朝又三十年而院始成後之  
繼者知珍之所以經其始秀之所以成其終又知國  
家厚乎民者使生有所養而死有所殯則是  
院也可不日加意乎時惇熙己亥正月望日  
元王逢題廣化梵隆羅漢應真將相姿云何與世  
遠時命殆齟齬冥栖遂忘返麟洲水復淺壑磨日彌  
短花鳥春長年  
雲山不知曉

西林禪寺 在府西慶雲橋北本名接待院宋咸淳間僧  
睿建前有寶塔七層名崇恩又名圓應明洪武二十年  
僧淳厚重建正統間僧法珮徙於殿後復建毘盧閣因  
請於朝賜額大明西林禪寺

國朝順治十七年僧成行重修康熙二十年山門左右盡  
爲市廛侵占二十年昭武將軍楊捷清復之并捐貲修  
大殿山門乾隆三十二年僧佛銘募修復還舊觀其後  
閣復傾圯嘉慶三年僧巨川募建至十一年主作倚亭  
始續成之十七年重建山門郡人陳廷慶記

明錢博昆盧閣記略 松郡距海甚通環帶峯柳舟  
航接泊以通百貨則惟城西而其據勝處有大禪刹  
曰西林禪院舊有崇恩寶塔歲久傾圯僧法編徒建  
於大雄殿後復建毘盧閣於塔後始於景泰壬申成  
於天順己卯三檐重建級高十丈深六丈廣十丈有  
寄上設毘盧像十二圓覺於西隅四楣左右後壁設  
十方諸佛下設地藏一座請賜大明寺額衆推編主  
寺蓋城西闌闌數里中而開與塔交輝駢峙以隆一  
郡偉觀癸未春予使交南還適郡守李侯惠通府洪  
侯景德吳侯春節推吳侯海供祖帳於西林且登焉

憑闌四眺若將遺世而超然者然後知佛之教必因其地與其境以表之蓋其教以見為聞以聞為修以應為形登是閣者見千萬佛之形本一性之化千萬事之夥原一心之萌目擊而道得不言而教行焉編之成此其擇勝以諭諸人者豈徒崇一閣以為飾哉編華亭人通內外典卓有戒行善詩奕嘗受教於徑山北邱項西疇云

國朝陳廷慶重建山門記略 寺創自宋咸淳間郡志基詳記而勿修者已久乾隆癸丑主僧巨川重建毘羅閣並修崇恩塔未幾示寂工幾輟會錢塘寄亭上人嗣席因憲司紳董力結成之添建湖亭法喜堂蔭蔦林予為文以紀而寄亭錫他駐山門尚未立也嘉慶壬申延寄亭本師慧良主院邀寄亭來共事於是誦吉興工山門峻整古剎斷手長衢列眉是舉也非前巨川後寄亭則雖介居闌闔中任其圯且毀焉於庠未易復舊觀也因志顛末而其詳具於別石不書嘉慶十七年八月日

西禪寺 在府西白龍潭上宋嘉定閒僧法因建洛陽范

開有記端平閒賜額西禪興福寺又名龍潭寺明萬歷閒僧聯輝重建藏經閣僧月印重造關帝殿生生閣

國朝順治十六年僧心一募修萬佛閣聽雷堂

宋范開記 華亭在三輔為壯縣環邑皆水其流濁而不深有一木焉獨深潔可淪可醺者曰龍潭也潭以龍名舊矣按圖經在縣西北三里蓋實有龍蟄其下歲旱祈澍山不雨必乞靈此潭隨禱輒應自昔迄今龍之功茂乎而古祠不存於祀事焉關紹興初有華嚴道場於潭際諸方禪宿莫不造焉歷時變遷蕩為民業邑有黃道者自童州出家梵行精潔久遊方外廣參知識踰四十年頓釋蒙滯盡得其要領而後歸每慨江湖禪納鮮放包之所且嘉其川流旁舍雲岫滿目以為神龍潛躍是必福地遂誅茅結廬其上邑人尊其德行相與捐金助成不閱數年而精舍益葺嘉定丁丑鄉闈之樂善者為其落髮被伽梨受具足戒法因其名也後因天台僧隆磊雲來遊聞龍神感通之異歸語鄉官吳越錢沆迺故相國成公季子

也錢具大信根聞而歎曰凡龍神所居多建佛殿塔  
廟而鎮安之如北五臺南徑山是也一日至潭上奉  
先世所藏佛牙五色舍利分施之凡二百餘類俾作  
龍供忽青蛇出現衆所共覩嗚呼異哉嘗聞諸釋典  
龍性剛猛有怒有喜怒則爲物舊害非但歲功農事  
而已然其性亦喜佛乘故如來世尊菩薩羅漢因天  
龍之所敬衛調代其性從而化之歸證道果昔北邙  
上人洞窟有瞿波龍王居焉佛知龍怒乃運神足往  
彼龍王見佛歡喜怒心遂息佛爲說法授以不殺戒  
自是國王城邑永無憂患緣是觀之舍利佛牙之所  
自出持以奉龍八部皆與奪心遁分如來舍利爲三  
八斛四斗天龍八部皆與奪心遁分如來舍利爲三  
而龍神分受其一然則舍利供龍豈獨於今爲然邪  
蓋一切衆生皆有佛性同一法性皆能成佛況於龍  
乎況當得佛之舍利乎夫舍利之爲佛如火光之餘今  
云設刹羅不壞之義也自佛入滅三昧火光之餘今  
流布人間世者亦不多見非相門未易致如此又焉  
知不自龍宮海藏而來其來也如是其歸也亦如是  
雖欲不置諸龍潭不可得也洛人范開久客錢門遠  
陪東閣目擊勝事因公以記文見屬又烏得而繫焉

嘉定己卯夏五

既望竹洞翁記

明陸彥章登龍潭佛閣詩

同人承日出郊圻野寺

危臺坐不歸望遠祇看高鳥沒憑虛欲共片雲飛干

林籟應鐘聲動萬井煙深水氣微自

愧塵機朝市裏得將心地暫皈依

聽雷堂

南安太守張弼讀書於此  
堂即其所名子宏至有詩

妙嚴教寺 在府城西東嶽行祠之東宋咸淳間僧智建

本三乘庵改妙嚴院元至正間敕賜為寺明景泰三年

僧昕東谷重建佛殿并山門塑十八應真像出邱彌陀

手眉目如畫為寺名蹟萬歷三十四年僧性靜智禪修

四十七年復修毘盧閣

國朝康熙初殿前基址為塵市所侵十九年知府魯超檄

行清理復還舊址二十七年僧寂學又修今寺圯壞前殿基址復被侵占東偏僧廬亦改作純陽祠穿壽安街巷而山門遂爲行徑矣嘉慶四年風雨大殿傾圯方事募修冀復舊觀云

延恩報德院 在縣西五里秀野橋東延恩巷宋紹興四年律師元偉卽接待舊址爲之二十四年守臣劉徽制請額後廢故延恩巷相傳爲寺基衝今故院重整復名古延恩院

延恩院 明正統閒越僧可立得黃氏地於雲閒第一橋西遷延恩報德院舊額而名成化時知府劉璟於院前



築祭江亭每歲清通設祭於此宏治間知縣張岐修

國朝康熙五十九年僧慎微重修乾隆三十年僧碧塵重

修

華藏懺院 在槐安坊內元僧融照建今圯

元鄧文原記略 松江府怡之西曰華藏懺院慧光  
融照大師之所創也師世家越之南明早受業華藏  
寺既而遊方參禮刻意修習傳天台教觀於台之掖  
峯杭之天竺最後從淵叟法師湛公居華亭延慶寺  
於今且四十祀嘗曰自吾絕浙河而西意未嘗不在  
華藏也雖得數十弓之地鋤荒制輿規爲蘭若庶以  
永華藏之思乎龔氏有故宅曠迥窅深心境冥會至  
元己丑輸貲以售稍經度越四年名聞帝京卽俾正  
席余山之音庶嘉昇師號而師念初志未竟益堅宏  
願藝斲陶甃傭役具興爲殿周阿中嚴像設崇門飛  
閣翼以兩廡棟宇旣備凡諸道具巨細完美不十年  
而訖工每歲元日修金光明懺期七晝夜與諸比丘

等埽除塵翳攝入善根敬以祝釐於君上名曰華藏  
懺院介佛海法師澄公屬予文以記其事予聞佛以  
妙圓清淨具大總持視山河天地皆同法界無量恆  
河沙衆悉歸性海作如是觀寂靜可以證解脫慧照  
可以通般若乃若機悔則又息妄之初機歸真之要  
路也然而過本乎身身非實有身空則諸法亦空而  
不空者未嘗亡是道也吾聖人嘗著之易曰不遠復  
无祗悔曰艮其背不獲其身行其庭不見其人其義  
淵矣博矣師性願質廣植善行老而彌勤舊業之在  
南明者祓於畢方復傾橐以新其山門度弟子曰居  
闍宗渠宗權皆克繼師之志其傳以甲  
乙云延祐二年歲次丙辰佛成道日

龍門寺 在集仙門內長生橋南舊在黃土橋宋釋如喜

創建淳祐元年賜額元至正二十年始遷今所郡士之  
貢行省者有司例設餞於此寺東倚城堞水木映帶頗  
延清曠左爲龍淵遇旱不竭中有海雲堂聽雪軒古田

莊濯足灘定僧石嘯月亭卓錫亭來鳳池楊維禎嘗就  
寺游宿有手植杉尚存好事者目爲龍門十景元末兵  
燬明永樂六年釋能勝重建後復圯廢半爲馮氏園

國朝乾隆二十四年釋大詮募修海雲堂聽雪軒四十三  
年復建大悲閣王嘉璧有記

元沙門大昕記略 龍門寺在府治東南隅初如喜  
了性二師俱習智者教行道於嘉泰辛酉間喜師主  
錢塘水月淨教院歸華亭距邑東五十里築庵暨性  
同居施湯茗嚴設佛像崇奉之淳祐戊申請今額易  
庵爲寺創造方新二師繼化嗣者勿克遂廢有思賢  
者性師嫡孫也馳譽禪林嘗主嘉禾普賢院歸視榛  
莽勵志興復擇地於黃土橋北而改作焉其徒行潛  
可宗克堪付託潛由靈隱第一座出住寧國廣教院  
遠莫之致而宗適退延慶講席居杭之南竺山至元  
丙戌命歸以寺守界之宗曰寺頽海年不熟屢有寇

至欲圖久而遺後人以安莫若再遷辛卯春賢師西歸宗乃相今所上地南瞰川流北通市閭厥位向陽平原如席衆咸樂之於是徙居焉作殿堂樓閣門廡庖廩悉備宗授正正授文文明授智傳傳錄其實讀記顛末爰述以爲記至元二十年乙丑正月日。

### 聽雪軒

元楊維禎詩 老夫聽雪龍門寺浙瀝霰鳴飄雪多龍噴雨花天作瑞象占雲葉氣生和月明蟹過銀沙岸風細魚沈玉海波萬籟一空天地老誰憐聲色老婆婆

積慶禪寺 本名坐化庵在府東南與龍門寺相望元至

正間邑人陳源爲慶禪師捨宅建慶坐化肉身在焉庵因以名明正統間僧慧明請今額其後相繼營建比名刹焉

國朝康熙五十六年修乾隆四十年提督陳杰復修嘉慶十四年參將周承德率屬重修

延慶講寺 在縣東南三百步乾道六年請額舊地本施家養宋隆興中每遇陰晦有金氣如柱亙天閒聞鐘聲吳僧守詳號碧雲者結茅蘆葦中以衆力成十六觀堂位居台宗十刹之上與五山爭雄主席者若佛光梅峯雲夢皆宗門匠碩明洪武初嘗籍於官十六年僧永歡奏復其後僧普智善啓等相繼營建內有玉龍洞天碧雲澄懷二堂嘉靖閒廢改爲鹽運司公署卽新察院佛像遷南關外曰延慶移山

元董楷重興寺記略 延慶寺比丘邱如月令其徒若  
虛請曰寺址本施家溝隆興間有大修行僧守詳自  
茹蘇來結茅蘆葦中多響從者以衆力成十六觀堂  
乾道始陽寺額開禧悉蕩爲灰燼主席迭更或營一  
殿一閣一堂一門工未究久輒淪壞開慶己未今住  
持思恭奉敕來適大歉乏食恭且貸且勸施者四面  
而至後連歉不乏且積羨餘議修建始庚申迄丁卯  
於未究者畢其工於淪壞者除而新之又爲堂爲寮  
爲廡爲廚爲庫五百餘楹蔽之文瓦藉之繡輶丹翠  
炳煥墉岸嚴鞏外則作飛梁作長生庫作兩別業塋  
田三千餘丈墾治廢田歲增租五百餘石又有忠訓  
陳君因感夢誕男捨所住宅移建於寺西荒址爲楹  
百餘設諸像其中且鬻宅買田百畝於是規模之整  
備事力之豐裕遠過昔時月又述恭之言曰余師佛  
光者主是席首謂寺之未振形勢使然東淮河盡梁  
諸亡何師移席鳳山猶語及予之建梁實師意也他  
役師所啓也又曰舊此寺羨租貯方丈備役費今旣  
卒業母爾有役日廩闕給可也遂集宿艾定議聞詩  
官鏤板以規將來夫不專美而推大其師能潔身  
以倡率其徒皆可紀也已咸淳六年二月望日

圓智教寺

在干山舊名禪居唐大中十三年建於華亭

西南二里晉天福中圯於水始遷今所卽陸機草堂遺址也太平興國中都水使者錢綽始構堂宇主僧嘉蟻爲天台韶國師弟子緇俗歸信精舍始備賜禪師號曰崇惠明教治平中賜今額明萬歷中太僕林景暘重修有梵香潮音雙松雲泉松月諸堂寺後護珠寶塔宋元豐二年橫雲里人許大全建淳祐五年釋曇慶修土人相傳春夏時常見塔影無數聚干山塔下名曰塔朝云又有上峯禪寺亦在干山

二俊祠

見壇廟

未沈遼詩 海天寥寥禾黍秋人籟已息煙露收數  
聲鶴唳草堂靜何苦更向咸陽遊

泗洲塔院 在崑山之巔宋乾道元年釋小古建明宏治  
四年建觀音殿嘉靖二十年建真武殿二十六年又建  
西方殿隆慶元年建三聖閣萬歷中建藏經閣

國朝順治五年郡人范宏議以山勢宜北而殿獨南向於  
形家不利僧溯本源遂鳩工易置法像不動一時皆旋  
觀者謂有神助康熙四十四年

聖祖仁皇帝南巡

御書奎光燭洲四字額以賜乾隆元年釋從如增建三官  
殿寺後慈雨塔相傳僧伽大士宣化江南時所建明萬



歷中重修今已記

明陸樹聲重修塔院記略 小崑山之側塔院自宋乾道初僧心古始其建觀音大士殿自余先世捐貲宏治乙卯僧忠詔始其左有禪堂但笑齋三聖閣右有二陸祠堂有方丈轉輪閣自萬歷乙亥僧濂始父老云崑山吾郡西北二十三里一峯鬱然綰結柳口晉機雲兄弟讀書其中是爲真崑山陸之祖征北將軍禪墓在焉勝國中峯禪師與五百人俱時見神虎出沒林莽道者李某能降之後荒圯山童樹禿雖小振於宏治鍾艾之餘然舍大士殿而外率與鳥鼠爭道而已賴濂上人拈据數年榛蔓瓦礫化爲莊嚴又禮請三懷講師宏敞法席余八十五矣常曳杖山椒相與徘徊藤花松影之下顧視石氣沈秀諸僧次第循謹信茲山重興之會也大較干將橫雲諸山寺枕山麓山不能兼柳柳塔浮水中水不能兼山獨小崑山兩收之而又二陸先生之靈實依於此非濂上人曷能成是勝乎余施田數畝以少續先志而士大夫之游於山中者各捐若干畝皆不可以無記

明王世貞泗州塔院詩 望去山中紫翠閒老僧趺  
坐掩禪關鐘煙盡靜青松冷獨有寒雲自往還  
夏完淳題崑山水殿詩 驚嶺峩峩谷水陰崑岡迢  
遞快登臨始知靈運尋山志猶是曇摩泛海心古寺  
松聲清磬遠寒潭雁影碧雲深青  
絲天棘風流在如見當年祇樹林

海慧教寺 在風涇宋建隆初里人姚廷睿捨宅爲寺初

名興國福壽院治平元年改今額祀姚爲伽藍神寺有

水波壁留春亭精進閣轉藏殿竝廢金沙灘圓田匯留

慶河八角井尙存

宋陳舜俞經藏記 秀州樵李之與壤華亭喚鷓鴣之  
名邑白牛村在其西有人煙之富海慧院於其間爲  
蘭若之勝先是賜紫僧奉英智力膚敏傑爲主者乃  
募人書所傳之經其兩八百其卷五千四十有八居  
人吳氏子行義施仁號爲長者爲之募財僱工作轉  
輸而藏之其屋若干楹載礮載琢飾以金碧以某年

某月落成白牛居民陳舜俞敘其議而贊之曰天下之險東有秦華南有衡岷西有崑崙龍門北有太行羊腸此天所以限方域也然而寶貨出焉而負重者至草木禽獸生焉而樵蘇弋獵者往馮者蹶而傷下者踣而死又生生之大患也聖人爲之觀轉蓬而作車以載之蟻峨決而溪通崴岨碎而塵飛視千仞以爲坦化顛踣以爲安車之爲利蓋遠矣無明之山慳貪之阻填患之岡寢暗之崔巍詐妄之叢棘深林淫亂之坑谷渙濶而衆生莫之能免也於是教之以法爲車以布施爲軸以禪定爲軫以忍辱爲轂以持戒爲韜以勇猛精進爲幅以般若爲輪度脫諸險不墮生死始於自載終於載人故此經之輪不爲無意也況夫我爲法輪致遠由已有相雖外發心必內心轉輪駛心止輪棍舉真如之性海一指而徧盡塵沙之法門有念斯足須彌納於芥子滄海入於毫端眞體道之樞機利物之關鍵作之者可謂妙用施之者不爲無窮之利乎若夫山淵同平安險一致馳騁乎無傲之駕遨遊乎無方之機非作非止孰溺孰載吾非斯人之徒其誰與遊然

僧德葵畫水壁詩 君不見昔人十日畫一水摩挲  
筆隨手起若非胸次吞江湖安得波瀾來筆底我  
未嘗看寺觀奇絕壁間隱隱騰蛟龍初疑乘風馭弱水  
恍然坐我蓬萊宮又疑去年八月秋水溢陰風襲人  
寧無濕誰知畫者巧通神董羽至今羞死筆此水不  
是畫一水一水勢相及對此融神坐終日後人雖畫  
畫不出何如倒卻毘陵筆  
嚴筆海悲此廊推第一

### 留春亭

僧德葵詩 聞說芳亭著意濃留連美景一壺中歌  
聲不放鶯聲老酒面長陪花面紅筍迸玉簪穿落日  
柳拖金綫繫東風時人盡道  
春歸去疑是桃源路忽通  
楊次公詩 古今春過知多少人不留春白頭早君  
欲留春心不知爲君一賦留春詩留春莫只留花住  
花老春風亦隨去孰若芝蘭  
香不歇亭下長如二三月

### 精進閣

僧德葵詩 五月六月火雲蒸家家納涼前後庭樓頭四鼓五鼓急閣上猶聞人誦經

寶藏禪寺 在海慧寺西宋熙寧初邑人吳延亮建白牛禪師開山紹興五年賜額寶藏護國禪院寺因舊名後廢

國朝乾隆四十八年里人卽故址重建改名紫竹林比丘尼居之

集福保國水陸禪院 在白牛寺東宋淳熙九年請額

澄照禪院 在泖中吳天澤記云唐乾符間老僧如海築基泖中作井亭施湯茗建塔五層標燈爲往來之望明嘉靖閒僧智明建大雄殿其徒自正於隆慶六年築石

隄以爲外護建寶藏閣以奉大藏經陸樹聲與弟樹德  
置常住田太倉王世貞爲之記至萬歷十八年又構  
音閣隆慶三年丈田均糧僉事鄭元韶知府衷貞吉以  
泖塔在湖中湮沒不常遂得免科萬歷元年復建青浦  
泖以西俱屬焉獨塔基因不起科仍隸華亭今屬婁

明屠隆塔院記略 余嘗與袁長史福徵沈徵君明  
臣莫太學雲卿馮吉士夢禎登泖塔坐藏經閣憑闌  
矚眺四面煙水迴絕大士浮圖巋然矗立煙雲空翠  
間洪濤春撞日夜撼其下川漁沙鳥芙蓉芰芡參差  
歷落鐘磬之音冷然與波浪相答少頃斷虹蜿蜒  
斜注木杪日氣霞采下射波心殿閣迴映閃爍陡作  
黃金相頃之月出東嶺波平如鏡流光蕩漾真似浮  
金刹舍余灑焉樂之時與諸君各賦詩紀游蓋幽峭  
空曠離塵絕世足資高流棲遯  
詞人登覽洵山川最勝處也

宋沈遼登柳塔詩 乘月上浮圖還見羣山影金焦  
是邪非一點漁燈映

元王逢詩 何年罕堵聳奇觀勢若蛟龍上糾蟠秦  
縣赭衣淪鬼國梵家寶藏壓驚端野瞻雨黑重燈夜  
天臥空青一鏡寒欲買扁舟  
占漁火老緣無力候衡官

福田寺 在柳濱宋淳祐十年錢仲圭建僧然開山景定  
閒賜額寺有吳天澤柳塔記李待問書浸月藏煙額董  
其昌小金山扁

化城永壽寺 在府南二十七里其址古胥顧柳也柳有  
六和神甚靈宋端平閒僧妙智架一室奉神神顯靈於  
人凡祈禱者以所驗重輕發土質柳未幾柳隆然遂構  
精舍曰化成庵元泰定閒賜今額

延壽院 在府西南李塔匯宋嘉定六年僧元信自定海來卓錫於此里中大姓錢氏捨宅結屋居之初名澄庵又改圓通寶祐咸淳間僧如雷始易今額元季燬明僧照重建

國朝順治十六年知府祖永勳捐修

國朝黃之雋記 天蕩蕩缺則補之山峩峩塞則開之人力之大何所不舉矧宮室土木哉然枋詣駁安帝締皇造而灰滅景絕毘耶給孤之遺蹟雖至淺近亦五百六十年歲則惟佛之力能役人之力於不能已婁李塔匯之延壽院其一也宋寧宗嘉定六年定海僧元信至里人通直郎錢某建澄庵居之又曰圓通庵度宗咸淳間僧如雷易今額元武宗至大里人知宣州事錢大信有記後兵燬僧照重建明神宗萬歷間里人錢大復新之相國龍錫父也

世祖章皇帝順治十八年郡守祖永勳重修逮今又八十



稔矣其地夷曠平衍一水環之非有穹巖邃壑深林  
與境棲幽而宅靈而歸然居江浙水道之通津五兩  
百丈往來其許者必泊遊而攬浮圖蘭若之勝埒於  
峯郭諸名刹中有古柏一歲月深遠大如一閒屋舟  
行遙見之洵怪特奇古物也而深窅闐寂萊畦衡縱  
塔鈴鳥語相答響而已相傳唐太宗子曹王明為蘇  
州刺史故以姓其塔蓋塔先於院云雍正二年院僧  
矢願修塔暨山門起禪堂靜室一新矣里人楊文龍  
復傾家財屬其戚沈君建圓通大雄殿置香火田若  
干畝而迎寄舟上人主法席則乾隆五年也儒者恆  
因泮宮衰而慨梵宇之盛奚庸哉佛者之居夫安得  
盡廬也晨曦升而各操業以繇乎萬塗而不相礙宵  
魄生而各偃牀以成萬夢而不相襲事之盛衰廢興  
因運會之適然而相遭時共時事其事豈能執我見  
以彊勉低昂之哉是故諸錢相紹以有此院也寢而  
衰謂上倡之檀施任之淳而興其適然而相遭邪天  
一補不復闕自一開不復塞是縱不能絜霄壤於終  
古而補往昔開來禪圖滿通達則力與鳩丁等倚舟  
名實如調記者三四至  
感其勤故饒舌不辭

示應庵 在白龍潭東北宋淳熙間僧瑄建明萬歷年僧

明心真允卽故址重建

國朝康熙十二年僧寂聞修侍御王廣心有記後殿廡盡圯乾隆四十七年里人重修

古蘭若 在府治西門外五里許張涇側古鐵笛和尚舊

址明萬歷間僧瑞庵草創未竣其徒三無拓而新之

明徑山雪橋圓信題 予覽傳燈錄有鐵笛和尚甚奇怪將滅度泛一缶於江流復吹鐵笛從容奄化水中次日居民覓之全身踟躕上偶過華亭古蘭若卽鐵笛之故址三無築室棲止焉豈非鐵笛之見孫故敘數言以闡其蹟 又題蘭若刺桐花云生平不受讚歎只喜人來琢磨翦去一身毛病便能異出藤蘿春添幾許顏色蜂蝶來往何多風雨打落一場懨懨

葦庵 在南門外東城河明萬歷閒宗伯張鼎爲僧守心  
建

國朝順治十三年提督梁化鳳建大悲寶殿乾隆二十二  
年重修

國朝高不騫詩 籬落門仍迴城隅徑不凡翠筠千箇繞  
白水半規街結宇傳張翥分燈從笑巖一花五葉後  
此種莫能芟

貝多庵 在雲閒第一橋西枕陸家浜明萬歷閒僧海淨  
重建李凌雲有記

賜子定光庵 在白龍潭西僧古月建

福庵 在白龍潭西本福建會館中祠天后庵側構屋爲

客死者寓柩之所康熙某年松江府知府龔嶸閩人因就庵北半里許買田八畝有奇築普同塔瘞之黃之雋記

蘆隱庵 在白龍潭北明崇禎間僧妙空建

國朝康熙間重建乾隆間修

瑞華閣 在金沙灘一名放生臺

潮梵庵 在雲間第一橋南今呼小補陀僧眞林建

靈峯禪院 在宋家橋西康熙間僧生漪買吳氏廢園建

僧性標撰碑記

直指庵 在西門外花園浜後明江右僧慧雲建

國朝乾隆間僧石屏募修

雨華庵 在放生橋北僧化儀建寺有古梅一株今萎

大悲禪院 在南門外亦名蘭玉山房明侍郎錢士貴建  
後敕立特祠於左今廢

茶庵 在普濟橋從郡至金山往來要道僧了凡建明萬  
歷間濬城河張宗伯鼎得施茶庵古碑卽置庵中

國朝康熙六十年里人公捐田畝夏施茶冬施薑飲以濟  
行人張若義有記

寶林庵 在包家橋北明御史徐宗魯墓左嘉靖年建

國朝康熙間張少宰集重修

湛然庵 在宋家橋西順治初建太常寺少卿吳廷揆有記

大乘庵 在西門外秀甲園北

浙庵 在三畝康熙中知府魯超重修以棲浙人之寓者  
南七寶寺 在七寶鎮元至正中建後易名聖堂中有如來鐵像今廢

楞嚴庵 在石湖塘西元謝伯理故居楊鐵厓觴詠處

龍樹庵 在洞涇東新浜北宏治間建

國朝乾隆十年修

紫竹庵 在楓涇鎮

九蓮庵 在四十一保庵前爲二里涇衆水入口要道潮  
汝衝激岸屢圯明萬歷閒設如來石幢以鎮之

國朝康熙閒里人卽以餘地建庵

聖月庵 在鶴蕩涇北舊名阿陀庵有寒山訪船子遺蹟  
明萬歷閒易今名

六和庵 在府東北十五里明萬歷閒顧承學建并造庵  
前後諸橋承學好義無子沒卽葬於庵西

焚蘆庵 在秀州塘江家浜明天啓元年僧一乘建

資福寺 在塘橋鎮元至正初建明宣德中賜額今多圯  
廢惟佛殿五楹存

國朝乾隆三十九年僧學武所募修也寺額廣平程南雲書前志以爲在城東十五里者誤

白蓮寺 在縣西五十四里宋紹興二十六年請額釋居簡有記

定光庵 在風涇鎮宋景定中僧通建

明張世美詩并序 定光寶藏二寺與海慧寺轉屈相並門徑幽絕因過有述 一徑幽深薜荔叢佛樓突兀倚晴空小樓煙水楓溪接上刹雲霞慧海通慈竹迎風喧聚雀蒼藤挂樹曲蟠龍貧僧避事門常掩誰道尋幽客興濃

崇敬庵 在一保俗名斯和庵明嘉靖閒御史馮恩建

觀音庵 在泗涇鎮元至大閒僧靜澄建



大慈寺 在北錢市元僧受建

祥澤庵 在塘橋鎮東元至正間僧道堅建

國朝雍正三年修

尼寺

普寧寺 在府南黃耳塚宋慶元六年尼如湛建

明何良俊重修記 普寧尼寺者在府治南七里旁有晉陸氏黃耳塚今殿後西北隅有土隆起二古木盤覆其上者即其處也人因呼黃耳祠俗遂呼為黃泥寺故有碑咸淳中燬不存余按傳錄本寺創建於宋慶元間有女師諱如湛號渾源湖州王家女母曹氏持奉圓通大士後生師在襁褓間即能道圓通品中語隨父防禦佐金陵戎幕遂落髮於清涼寺尼僧智元所能通華嚴元覺法華諸大部經銳志參訪至華亭禮船子塔時安康郡夫人號普明居士者與無住居住二人留心大乘得師談論洞明心印郡中適

寂照院虛席請師開堂師一日與二居士泛舟城南  
至蓮花蕩見水天交接師指之曰此地塵迹不到可  
建立梵剎卽鳩工車戽果得神龍窟穴遂定基興建  
檀施雲集不數月而寺告成碑所載開山之迹如此  
今寺旁一望皆平陸不復有水天交接之處而碑中  
亦不載黃耳事然予三十年前曾一至其地見頽垣  
傾棟之閒有袁海叟詩卽篆養有恩終不背交游何  
事獨相欺至今膾炙人口者是也余猶憶有朱鳳山  
詩今已忘之然大率皆詠黃耳事則其旁爲黃耳冢  
無疑余今年春與董太學子元顧隱君子登弔古城  
南因至其地見殿宇完整詢之則尼寺道權所修建  
也中爲正殿三楹次而兩翼其旁爲側室各兩楹前  
爲門廡右爲居宇庖湍寢室皆具竹樹靜深儼然一  
名利也二君曰此華亭一勝處公當記之嗚呼三吳  
富貴之家遠延土石役萬夫以構第宅營冢墓者何  
限然未百年而羊頭傾倚於蔓草之中墓已犁爲田  
者比比然也其第宅或子孫不克堂構則不數年而  
幾易主其視此何如夫白晉迄今千二百餘年而黃  
耳冢巋然獨存普寧一尼寺耳當垂廢之餘而又有  
道權振復之是亦豈偶然哉蓋寺賴名迹以永存此

家亦託之寺而不齟齬於牧樵之手謂天不有意乎物類亦知有義以人質之不能無愧則天豈不欲祐之而使之長不朽於宇宙之間邪是不可以不記乃書之於石以告來者

竹隱庵

在附二畝宋建炎中建

貞靜庵

在橫潦涇尼真如住持明吏部尚書張翰陸光

祖有記都御史陸樹德女未嫁夫亡焚修於此

三乘庵

在妙嚴寺西北隅與寺隔一清河卽寺地也明

崇禎間僧寂覺與徒照耀築陡構舍因寺之始創原名

三乘卽以名其庵云今爲尼庵

誠心庵

在南門外大橋

國朝節婦吳鄭氏建蔡鴻業有記

不香庵 在茭蘆庵側船子和尚曝簑處僧明璘建

道觀

谷水道院 在府城西谷水坊內前志云在瑁湖北許尚  
百詠題有道院注在西湖之西後爲延氏蔬圃疑卽此  
地曰谷水者湖之故名也宋寶慶二年道士陸景微建  
明洪武二十年道士葉雲谷增修後燬於火道士黃碧  
窗里人馮驥重建今湖已湮廢院之南悉爲民居其外  
一水縈紆舟楫罕達非考圖志人不知爲湖矣中有來  
鶴亭東雲所

國朝康熙中道士趙熙明建三茅堂 莊親王賜得一以

盈額乾隆五年道士王聲萬建斗姆閣九年重修大殿

國朝沈大成記

谷水道院在府城西陸瑁湖之上考傳

記三洲出華亭谷曰谷水院去柳也遠而假以名豈當時井邑荒落煙水瀾漫其波光雲影若與柳接而因以名之邪今則環院之左右皆民居陸瑁湖之流久塞欲尋其故址而已失宋寶慶二年道士陸景微實創是院及

國朝

康熙十年住持趙熙明始構三茅堂至乾隆五年住

持王聲萬始起斗姆閣又九年重修大殿又二年因拓兩廡他若棲客之房養靜之室與夫庖廩牆垣之屬皆以次而理糜白金三千兩有奇皆出於聲萬而助者僅二百緡又以餘力置田二百餘畝以贍其徒云余祖居密邇往來院中其師趙臨谷每引余周行輒歎曰院將壞數募而無應吾觀諸弟子惟聲萬可屬以院事庶其復興有日乎聲萬受正一符籙學禹步飛行考召之術請兩治魅多驗以是其道日行節縮所入而營繕之蓋積二十歲而克如其志其師可謂知人矣自宋理宗寶慶丙戌至今乾隆丙戌五百餘年當時之故家右姓與夫高門大閥名園芳樹不

知湮沒凡幾而此院歸然獨存乃知富貴重祿不若  
山野方外之爲而梵宇琳宮之廢興亦繫其人之有  
無也聲萬名雋望余幼同童子師相從嬉戲回憶猶  
昨而今俱成老禿翁矣春暮歸自廣陵聲萬巖石以  
請遂記之

### 東雲所

明錢福東雲道士歌 禹步蹴震垣青雲翳雙履鏗  
然一鼓萬物茁東華親授生生理騎龍握參先太陽  
扶搖倏忽幾萬里爾乃鳬翻折暫落滄溟滄溟荒  
斥弗可卽日夕枕漱西湖水崑山北谷有水瑩無滓  
別號西湖無乃是水以北爲陽斯言亦奇旨雲邪水  
邪泊乎相遭兩兩總無心南北東西亦奚異谷之陽  
雲之東坐看雲起行水窮飄然獨得誰能從緣波不  
釣尙書魚紅雲常護仙人宮逍遙步明月徒倚臨清  
風移石放舟尙礙雲根動翳苔自飯操畚縮慙憐長  
松青牛出關去不返水雲深處鶴髮頽皤翁近聞天  
亦私古傳道至公滯君小住三百載且莫掉首  
思凌空候余養就餐玉法把袂闔闔談參同

來鶴亭

明錢福詩 放鶴亭前來鶴亭自來自放幾時停道  
人莫跨入雲去且坐亭中默誦經

長春道院 在府城集仙門內橋北元大德十年道士鄭

真建爲境內全真教祖

元浮梁楊載記 余游松江館長春道院其主人則  
錢塘鄭君道真君之言曰僕幼時聞北方人爲全真  
教其祖師則長春邱真人得鍊氣養神之道心甚慕  
焉父故將家將卒干人戍守嚴陵因病免官大將將  
以僕名聞朝廷使襲父官僕自念苟學道有功得如  
邱真人雖貴爲王侯猶不足比擬何有於列校哉縻  
繫於此終不得爲所欲爲矣遁去至永嘉師受道要  
居密室中累年一旦心躍然思歸不可制止歸則父  
母皆已卒葬慨然曰身無卻顧之憂吾道其遂成乎  
於是益務遠遊至松江松江人無爲全真教者非僕  
客朱氏則俱託於逆旅主人僕遂有志結庵買地二  
畝築室四閒度弟子朱道本等使嗣守之僕尋去之

丹陽欲渡江不果復還永嘉時邑中大家計肅夏世  
昌二人增地七畝創爲道院使人招僕主其事余聞  
北方人以全眞名教始重陽王眞人金之衰也諸侯  
割據山東鼎沸王眞人之貌異於常人慨然有拯天  
下之志天數奪其計其徒壯士叛己因絕食居山中  
積數年有道爲神仙度弟子七人邱眞人最後出本  
朝聞其賢遣臣劉仲祥迎至漠北謂太祖受命於天  
爲萬姓除殘賊必無多殺上感其言斬刈之威大爲  
衰止夫爲道者無爲而無不爲而善藏其用則可以  
功濟天下古之人有知之者子房是也今邱眞人以  
度世爲業而能盡力匡維有補於萬億年之鴻緒絜  
功盛大詎讓子房哉今爲其學者皆絕去嗜好以粗  
惡爲衣食室中徒設楊植坐內踵狀類禪定而中有  
所事事其法具於抱朴子第邱眞人之道顯重於世  
故學者推之以爲祖焉道院之制前殿祠祀老子其  
外兩廡其後爲堂高下隆殺與殿相承余所假館直  
室之東北隅曲徑深窅有池水叢竹之勝鄭君之爲  
人無驕氣無惰容色常欣欣然如齠齔爲童子時鄉  
人化其善賢者樂從之游鄭君視之泊然不以繫累  
乎其心有道之候庶幾在此至治元年四月望日



又春雨卽事呈鄭尊師 南榮相距數尋閒滿地春泥隔往還夜雨暗添籬腳水曉雲濃掩樹頭山修篁夾徑宜增植細雨侵階莫漫刪世慮紛紛無止極敢求大藥駐衰顏  
元王逢題長春道院桂風子與朱貞一真人詩 仙人桂風子勇別上清君晞髮三神日巢松五老雲桃  
惟今問訊奎閣舊論文游幔峯青疊蓬頭竝鶴羣

朝元道院 在泖口元大德閒道士陸景眞建

朝眞道院 在干山元至正三年道士郭松溪建明萬歷

中重修建餐霞館

祐聖道院 在府東北葛家渡元至正閒道士張守光建

今廢

太素道院 在府南郭外元至正九年邑人劉維一人道

時所建南瞰瓜涇林木幽蔚宛在人外中有端坐全真之所曰雲巢故號雲巢子楊維禎錢惟一周之翰日往游焉

蓮溪道院 在西門外蓮溪東康熙十四年建三元殿斗姆文昌二閣沈楫有記乾隆四十二年道士顧一鶴募修

松江府志卷七十五終